



UNIVERSITÄTS-
BIBLIOTHEK
PADERBORN

**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

xxiii La vie de s. Clement, Pape & mart.

[urn:nbn:de:hbz:466:1-75777](https://nbn-resolving.org/urn:nbn:de:hbz:466:1-75777)

— & vn an. Neantmoins l'an mil cinq cens nonante-neuf, le Cardinal Sfondrat titulaire de sainte Cecile, nepueu de Gregoire X I V. d'heureuse memoire, fit fouiller dessous le grand Autel, où l'on trouua le corps de ceste precieuse Vierge & Martyre, dans vn cercueil de Cyprez aussi poly & entier, comme s'il eust fort de la boutique du Menuisier. Le corps Saint estoit enuélé dans vn voile d'or, aupres duquel on trouua les corps des autres saints que nous venons de dire chacun à part, & lon trouua les suaires dans lesquels le corps de la Sainte Vierge Cecile auoit esté premierement enseuelie toute rouge de son sang, dont Rome fut fort resioüie. Le saint Pape Clement V I I I. y dit la Messe Pontificale, & colloqua de nouveau en grande solemnité le corps de sainte Cecile, & des autres Martyrs dans la mesme Eglise.

La vie de ceste pure Vierge a esté escrite par Simon Metaphraste, qui est rapportee par Lipoman en son 5. Tome, & par Surius au 6. de la vie des Saints. Les Martyrologes font mention d'elle, & le Cardinal Baronius en ses Annotations sur le Martyrologe, & au 2. Tome de ses Annales, & les Notaires de l'Eglise Romaine, desquels les autres l'ont emprunté, escriuirent son martyre.

A Rome sainte Cecile vierge, ayant conuertie à la Foy, & excité au martyre son espoux Valerian, & son beau frere Tiburce, apres qu'ils eurent enduré le martyre, fut prise par le commandement du Prefect Almache, jettee au feu, duquel elle ne fut endommagée, & puis decapitée, du temps de l'Empereur Alexandre. Au mesme lieu saint Cereal qui auoit esté lieutenant du gouuerneur, endura la mort, du temps de l'Empereur Adrian. Item à Rome saint Marc martyr, venant des quartiers d'Afrique pour visiter les sepulchres des saints apôtres, fut martyrisé sous l'Empereur Numerian, & Celerin gouuerneur de Rome. A Colosse ville de Phrygie les saints Philemon, Archippe & Appius disciples de saint Paul, du temps de l'Empereur Neron, furent vn iour de feste de Diane surpris par les Gentils qui se rendirent maîtres de l'Eglise des Chrestiens, & les autres estans sauuez à la fuite, retindrent ces trois, lesquels par le commandement du President Artoles, furent battus de verges, mis en terre iusques aux reins, & puis accablés de pierres. En Antioche ville de Pisidie, endurerent saint Marc & Estienne, sous l'Empereur Diocletian. A Autun en Bourgongne saint Pragmace Euesque & Confesseur.

LA VIE DE SAINT CLEMENT,
Pape & Martyr.

— ^{23.} ^{Nov.} **S**aint Clement estoit Romain, d'une illustre maison, & fort proche parent de l'Empereur Domitian. Son pere s'appelloit Faustine. Il naquit au quartier du mont Celsien, où est à present l'Eglise saint Estienne le Rond, & celle de saint Jean de Latran. Il fut disciple de l'apostre saint Paul, & l'ayda en la predication de l'Euangile, comme il tesmoigne en l'Epistre aux Philippiens, quand il dit: *Moy & Clement, & mes autres compagnons, qui travaillent avec moy en l'Euangile, les noms desquels sont escrits au liure de vie.* Apres il se rendit disciple du Prince des Apôtres saint Pierre, & à cause de sa grande sainteté, scien-

ce & prudence, le mesme Apostre l'institua son successeur en la Chaire Pontificale, & Vicaire de Iesus-Christ en terre. Neantmoins il estoit si humble, qu'apres la mort de saint Pierre il s'estima indigne d'occuper ce siege, & iugea que par cet exemple qu'il ne falloit pas ouurer la porte à rendre ceste souueraine dignité, & les autres de l'Eglise, comme hereditaires, & qu'on ne les donnast pas à ceux qui ne les meritoient. De sorte que saint Clement quitta sa place en premier lieu à Lin, & depuis à Cleme, qui succederent immediatement au Pontificat de saint Pierre.

Saint Bernard parle de luy en ces termes: *Saint Clement estoit homme tres-noble, tres-riche, & tres-sage, parce qu'il estoit tenu pour vn grand Philo-
sophe. Il auoit receu tous ces dons de Dieu, daquel ils procedent tous, & neantmoins il les mespris pour l'amour de luy, n'en faisant non plus de conte que du fient: pour gagner nostre Seigneur Iesus-Christ.* Quand il fut Pape, il se rendit fort soigneux de faire escrire les actes des Martyrs, qui ont cimenté l'Eglise de leur sang, & ont seruy d'exemple de ce que nous deuous faire & patir pour paruenir à la vie que nous esperons. A ceste fin il nomma sept Notaires qu'il mit es sept quartiers de Rome, pour s'enquerir & rediger par escrit les batailles & triumphes des Martyrs. Il commanda que les Chrestiens, apres le Baptisme, receussent le Sacrement de Confirmation. Il ordonna que la Chaire Episcopale fut mise en lieu public & eminent. Il preschoit la parole de Dieu avec tant de ferueur & d'esprit, que plusieurs Gentils se conuertirent à nostre sainte Foy: aucuns desquels non contents de garder les preceptes de nostre Sauueur & Redempteur, passioient plus auant pour s'adonner à la perfection, & suiure les conseils Euangeliques, viuât en chasteté: car saint Clement demeura toujours vierge, & amateur des Vierges, loüant & exaltant sans cesse ceste vertu celeste. Il consacra à Dieu Flauie Domitile, niece de l'empereur Domitian, qui estoit fille de sa seur, de flauie Clement, laquelle estoit fiancee avec vn grand Seigneur nommé Aurelian: encore qu'il sceut que ceste action là luy deuoit couster beaucoup de peine. Il conuertit aussi à la Foy, Theodora femme de Sisine, l'vn des plus grands & premiers de Rome, lequel desirant voir ce que faisoient les Chrestiens es Oratoires où ils s'assembloient (à cause qu'il seauoit bien que sa femme y alloit) il y entra secrettement: mais Dieu permit qu'il en perdit la veüe corporelle, pour recouurer celle de l'ame. D'autant que les prieres de saint Clement rendirent la veüe à ses yeux, & ses paroles illuminerēt & penetrerent le cœur de Sisine, en sorte qu'il se rendit Chrestien, & fut baptisé & à l'exemple d'vn si grand personnage plusieurs autres receurent la Foy de nostre Seign. Le nombre des fideles croissoit de iour en iour par la predication de saint Clement, & par plusieurs grands miracles qu'il faisoit continuellement. Le diable enuieux de ce bien, suscita quelques Ministres prestres de ses Idoles, & d'autres mau-

uais garnemens pour persecuter saint Clement, & esmouoir le peuple contre luy, comme estat ennemy iure de leurs Dieux. Il fut accusé deuant Mamertin Prefect de Rome, qui estoit vn homme rassis & prudent: Il l'enuoya querir, & le traicta avec beaucoup de respect, sçachant de quelle maison il estoit, luy remonstrant doucement qu'il deuoit adorer & reuerer les Dieux de l'Empire Romain, sans introduire vne Religion nouvelle. Saint Clement respondit avec la resolution & integrité digne de luy & de sa charge. Mamertin apperçut que la ville s'estoit diuisee & factionnee là dessus; les vns accusoient le Saint comme vn enchanteur, sacrilege, ennemy de leurs Dieux, & autheur d'vne superstition estrange, qui preschoit qu'vn homme crucifié estoit Dieu: les autres au contraire le louoient comme vn homme sage, & prudent, prest à faire plaisir à tout le monde qui auoit quary plusieurs malades, secouru les pauures, sans auoir iamais fait chose qui peult offenser personne.

Le Prefect se trouuant en ceste perplexité, consulta l'affaire avec l'Empereur Traian, lequel comanda que Clement sacrifast aux Dieux, ou fust banny & confiné dans l'Isle Cherfonese, qui est au bout de la mer Noire. Avec ceste response de l'Empereur, Mamertin s'efforça de persuader saint Clement d'adorer les Dieux, & Saint Clement tafcha à le faire Chrestien, luy donnant à entendre que le bannissement endure pour Iesus-Christ luy seroit fort agreable: & nostre Seigneur accompagna ses paroles de tant de grace, que Mamertin pleurant de pitié, dict à Saint Clement. Le Dieu que tu adores te vueille fauoriser en ce trauail que tu endures pour l'amour de luy. Il fit fréter vn nauire, dans lequel Saint Clement s'embarqua pour aller en exil: plusieurs le suiuirent volontairement, laissant leurs pays, leurs biens pour accompagner leur Maistre & Pasteur. Il s'y trouua bien deux mille Chrestiens que le mesme Empereur y auoit releguez, lesquels trauailloient aux carrieres de pierre, qui furent tous consolez par la venue de ce Pere & Docteur. Il les encouragea, leur disant, que Dieu l'auoit enuoyé là pour participer à leurs prieres & merites. L'vn des trauaux des Ss. Martyrs en ceste solitude, c'estoit la disette d'eau, laquelle il faisoit aller querir sur les espauls à deux lieues de là: trauail qui leur estoit beaucoup plus penible & insupportable que celuy de couper la pierre & la porter. Le S. Pape eust grande compassion de cét ennuy des Chrestiens, lesquels il aduertit de faire tous oraison, & supplier nostre Seigneur qu'il leur descouurist quelque veine d'eau viue pour les soulager de ceste peine. Le Saint ayât acheué sa priere, leua les yeux, & apperçut vn aigneau qui sembloit luy faire signe du pied droict où estoit l'eau: il n'y eust que S. Clement qui vid l'aigneau, qu'il iugea estre Iesus-Christ. lequel apparroissoit en ceste forme, pour luy montrer qu'il l'auoit exaucé: il alla sur le lieu, & dit, Fouillez là au nom du Pere, & du Fils, & du S. Esprit: chacun comença à bescher, qui deça, qui delà, luy

mesme prit vn hoyau, & du premier coup qu'il donna là où il auoit veu l'aigneau, il fit reiallir vne fontaine d'eau douce, qui fit vn gros ruisseau, dont ils furent resiois: le bruiet de ce miracle s'espandit par tout le pays, le peuple accourut pour voir saint Clement, & entendans la doctrine de ses paroles, les Gentils se conuertissoient à la Foy en si grand nombre, qu'il en baptisoit tous les iours plus de 500. personnes, & en moins d'vn an on bastit 75. Eglises, qui furent dediees à nostre Seigneur Iesus-Christ: les Temples des Dieux furent abbatuz, tous les Idoles & simulachres du pays de cent lieues à la ronde furent brisez, & mis en pieces. Le nombre des fideles se multiplioit à foison par la predication du S. Pape Clement: l'Empereur Trajan en estât aduertý, despescha en cholere vn Prefident nommé Aufidan, qui fit vne espouuanteable bouche-rie des Chrestiens, les martyrisant de diuerses sortes de tourmens & de morts; neámoins les trouuant tous cõstans en la Foy, & mourir ioyeusement, il estima plus à propos d'espargner la multitude, pour s'adresser au chef & maistre d'eux tous, Clement, lequel ayât aussi trouué ferme en la confession de N. S. I. G. & qu'il ne le pouuoit persuader d'adorer les Dieux, il comanda aux bourreaux de le mener en pleine mer, & luy attacher vn ancre au col, & le submerger, de peur que les Chrestiens ne l'honorassent comme vn Dieu, les Chrestiens etterent tous de hauts cris, quand ils sceurent la sentence qui auoit esté donnée contre le S. pontife, parce que c'estoit leur pere, leur maistre, leur frere, & fidele amy, & en vne vie si desconfortee, la consolation vniuerselle de tous: le Saint Pape ressentoit leur tristesse, pleuroit avec eux & les cõsolloit le mieux qu'il pouuoit: le peuple qui regardoit du bord de la mer, le voyant prest d'estre precipité, s'escria à haute voix, Iesus-Christ sauuez-le: Et S. Clement dit, Pere eternel receuez mon esprit. Il fut ainsi ietté en la mer, où il receut la couronne du martyre: les Chrestiens demurerent fort tristes & affligez: il y auoit parmy eux 2. disciples de saint Clement, Cornelle & Febe qui dirent aux autres, Mes freres, prions Dieu qu'il luy plaife nous monstrier les reliques de ce saint Martyr: apres qu'ils eurent fait leur oraison, la mer se retira plus d'vne grãde lieue, en sorte qu'ils y allerent à pied sec: ils trouuerent (O Dieu tout-puissant operateur des merueilles, & qui faites tant d'honneur à vos Saints!) dans la mer, vne Chappelle, ou petite Eglise fabriquee de la main des Anges, & audecã d'icelle vn cercueil ou auge de pierre, dans laquelle estoit le corps de saint Clement, & auprès de luy l'ancre qui luy auoit esté attachée au col en le jettant dans la mer. Ce miracle n'arriua pas seulement l'annee que ce Pape mourut, mais aussi toutes les autres années suiuan-tes, la mer se retiroit vne lieue, & laissoit le chemin libre sept iours durant, à sçauoir le iour de son martyre, & les six autres d'apres. La nouveauté de ce grand miracle conuoit les Pelerins de venir de toutes parts visiter le sepulchre du Saint, pendant qu'il estoit descou-

23.
Nov.

uert. Il y alla vne femme avec son petit enfant, laquelle entrant dans l'Eglise où reposoit le corps du saint Martyr, l'enfant s'endormit. Au bout de sept iours la mer reuint dans ses limites ordinaires, chacun se retira, & la mere de l'enfant qui dormoit (Dieu voulant par ce moyen honorer saint Clement, & manifester le pouuoir de la sainte intercession) l'oublia dans l'Eglise. Quand elle fut dehors, elle s'en apperçut lors qu'il n'y auoit plus de moyen de le secourir (d'autant que la mer estoit desia par dessus l'Eglise) elle fit tout ce qu'on scauroit penser en vne telle extremite & croyant que son fils estoit noyé, elle courut tout au long de la coste pour trouuer son corps, & le faire enterrer: ne l'ayant peu trouuer, elle s'en retourna bien triste & affligee, & passa l'annee avec cet ennuy: l'annee d'apres, elle ne perdit pas la deuotion d'y retourner en pelerinage, encore qu'à son aduis, elle y eut beaucoup perdu l'an passé: elle entra dans l'Eglise, & fit son oraison sur le tombeau du saint, puis iettant piteusement les yeux vers le lieu où elle l'auoit laissé, elle le vid qui dormoit encore en la mesme façon qu'elle l'auoit laissé: elle courut l'embrasser toute folle & rauie d'aise; & apres l'auoir baissé en pleurant de ioye, elle luy demanda qu'il estoit deuenu toute ceste annee: l'enfant respondit qu'il n'auoit fait que dormir, sans scauoir combien de temps durant: cet espouuantable miracle est escrit par saint Ephrem Martyr, Euesque de Chersone, & saint Gregoire de Tours, & le Pape Iean III. en fait mention en vne de ses Epistres aux Decretales, & autres Auteurs. Metaphraste dit que le iour de la feste du Saint, ceux qui visitoient son tombeau, obtenoient de Dieu ce dont ils le prioient par l'intercession de saint Clement, & que les auengles y recouuroient la veuë, les boiteux leurs pieds, les manchots leurs mains, & tous les mala des fanté, les possédez estoient deliurez en touchant seulement les Reliques du Saint & beuuant vn peu d'eau beniste. Qui n'admira donc la liberalité de nostre Seigneur Iesus-Christ à l'endroit de ses seruiteurs, la facilité dont il les exalte, & assubiectit toutes les creatures à leur commandement. Que si le peuple d'Israël fit tant de cas d'auoir veu vne seule fois la mer entr'ouuerte pour les laisser passer à pied sec, lors qu'ils estoient poursuiuis de l'armee de Pharaon: comment ne nous esmeruellerons-nous, voyans que la mer se retiroit tous les ans le iour du martyre de saint Clement, laissant la terre libre & ferme à ceux qui voudroient aller honorer son corps Saint. Quel sepulchre pouuoit estre plus glorieux que celuy qui auoit esté basti de la main des Anges, en faueur de ce Saint? Quel plus doux sommeil que celuy de l'enfant qui dura vn an entier? & quelle plus grande merueille, que de rendre à la mere l'enfant qu'elle auoit si long-temps pleuré pour mort? Voila les miracles que Dieu opere, pour honorer ceux qui le glorifient, & esleuer ceux qui s'humilient & aneantissent pour l'amour de luy: Que s'il fait cela en la terre, que fera-il au

prix dans le Ciel? afin que chacun prenne courage de seruir vn si bon Seigneur, & ensuiure saint Clement, qui souffrit & endura tant pour l'imiter. Au lieu où s'ouuidit la fontaine par la priere de saint Clement, le Pape Nicolas premier du nom, fit bastir vne Eglise en l'honneur, & au nom de saint Clement, & de son temps Cyrille homme saint apporta à Rome le corps de saint Clement, lequel fut posé en grande solemnité en vne Eglise de son nom, qui auoit esté fondee auparauant, ainsi que dict le Martyrologe Romain. Saint Clement vescu au Pontificat neuf ans: il celebra les Ordres deux fois au mois de Decembre, où il fit vnze Euesques, dix Prestres, & deux Diacres: il fut martyrisé le 23. de nostre Seigneur 102. sous Trajan, le vingtcinquesme de Nouembre. Saint Clement escriuit des œuvres admirables, par lesquelles il enseigna & enrichit l'Eglise de Dieu, encore que nous en ayons desia perdu d'aucunes, & qu'il y ait varieté entre les Auteurs de celles qui restent, les vns affermans qu'elles sont de luy, & les autres au contraire: d'aucuns disent qu'elles ont esté corrompues & deprauees par les heretiques: saint Hierosme au liure des Auteurs Ecclesiastiques, dict que saint Clement escriuit vne Epistre au nom de l'Eglise Romaine, à celle de Corinthe, qui se lisoit publiquement en d'aucunes Eglises, laquelle rapportoit fort celle que saint Paul escriuit aux Hebreux: il adiouste qu'ils s'en trouuoit encore vne autre sous le nom de saint Clement, qui n'auoit pas esté receuë pour telle des Peres anciens, non plus que la dispute de saint Pierre contre Appion: Voila ce que dict saint Hierosme des œuvres de saint Clement & allegue Eusebe de Cesaree.

Le Pape Gelase censure comme apocryphes les actes publiez sous le nom de l'Apostre saint Pierre, & le liure des Canons Apostoliques, de quels deux liures aucuns disent que saint Clement Pape est l'Auteur: mais d'autant que l'examen des vrayes & legitimes œuvres de saint Clement, & de celles qu'on luy attribue, qui ne sont neantmoins pas de luy ny de son stile, n'appartient pas tant à ce lieu, comme le discours de sa vie & de ses vertus, nous renuoyons ceux qui desireront s'en esclaircir à ce qu'en escrit Baronius & Sixte Siensis, & à François Turrien Iesuite, qui traite doctement & amplement ceste matiere, qui en a escrit deux liures, l'vn pour la deffense des Canons & Constitutions Apostoliques de saint Clement, & l'autre de ses Epistres, & de celles des papes de Rome. Il est parlé de saint Clement dans saint Irenee, saint Epiphane, saint Hierosme, saint Augustin, Optat de Mileuy, & Eucher, en tous les Martyrologes, & es Auteurs des vies des Papes.